

ORANJE MONSTRUOSO

Den centro di Oranjestad



E gai Cora a canta masha pisa ayera anochi den centro di Playa, lagando varios establecimiento destrui, entre nan La Linda (ladies department). Riba pagina tres por lesa relato di e candela desastroso aki, mientras cu riba paginanan mey mey por mira potretnan di e sinie-stro. Bomberonan di gobierno, di Valero y di La Cabana, tambe asistencia di Cruz Cora y di voluntarionan a presenta pa combati e candela cu mey anochi tabata doina.

Oranje Monstruoso

Den Centro di Oranjestad



ORANJESTAD (AAN): ----
"Nos unico pacus di pueblo!" "E pacus icono di pacusnan di Arubianonan", "E pacus ehemplo pa tur otro riba nos isla", "e pacus cu a percura pa nos pobernan decenas di aña sin cambia e servicio", "esaki tabata nos pacus folklorico", ta entre otro e lamentamento nan cu a drenta na redaccion ayera anochi di lectornan clientenan di La Linda.
 Hopi di nan na yoramento, mescos cu na e lugar di candela, empleadonan di La Linda cu a percura pa nan tabata presente pa por yuda cu kico cu nan lo tabata por, tabata yorando, mirando con

nan establecimiento unda cu amor nan a traha pa e pueblo Arubano, a bay perdi.
 La Linda departamento di damas, a keda destrui ayera anochi den e candela feroz cu a ser considera como un catastrofe pa Aruba y pa comercio Arubano.
 Publico cu a bay na e lugar di siniestro tabata para yora, mirando con candela tabata devora nan pacus favorito, nan orguyo.
 Por a scucha latinonan presente lamentando con e pacus cu semper a habri man pa nan a bai perdi. Varios di nan papiando y yorando, relatando con facil nan a haya credito pa por a cumpra paña pa viaha pa nan pais.

Otronan cordando regalonan cu nan a ricibi di empleadonan.
 Ayera anochi a drenta informe na Central di polis cu tin huma ta sali for di edificio di La Linda den Caya Betico Croes.
 Bomberonan a worde notifica mes ora y a presenta cu dos unidad.
 Segun informe, personal di Visibility Team Down town tabata pasando den caya y a constata algo straño y a nota huma ta sali for di La Linda. Mesora nan a reporta esaki na Central di Polis. B
 E bomberonan cu a yega na caya grandi, a cuminsa investiga parti dilanti y busca pa determina di unda e candela

lo a cuminsa.

Tabata dificil pa por a habri y drenta via parti dilanti di La Linda.

A keda na prome instancia cu lo por tin huma y candela cu ta broei den Arco Iris, pero esaki no tabata e caso ora cu esaki a worde controla.

E otro empresanan cu ta den e edificio di La Linda manera Coral, tabata sera cu su roller, tambe gerente di Shalimar a presenta, pero e mester a para waak, mescos cu gerente di Aruba Bank, cu ta pega cu e edificio di La Linda.

Segun por a compronde, coriente a worde kita y na mesun momento e delco a "switch on" pa asina e banco keda lus. Arco Iris, Shalimar, Coral y La Linda a kima, tambe e hoki di bende snack pariba di la Linda, mientras cu Weitnauer a sufri masha daño di huma y kizas esaki lo causa daño di nan surtido tambe, y Aruba Bank tambe a keda bao di vigilancia ayera anochi y awe lo ta cera.

Direpiante un vlam a cuminsa via di dak parti patras di La Linda.

Na parti dilanti di e edificio e ora ey, bomberonan a cuminsa usa awa y esfuerso tabata worde haci pa esaki por spuit riba e dak.

Mirando e situacion, a pidi mas refuerzo, entre otro pa bini cu e hoogwerker.

A solicita bomberonan cu ta na cas, pa presenta y tambe mas unidad a worde yama pa drenta servicio mes ora, pa yuda combati e candela cu tabata menasa di expande mas.

Tambe un truck special cu pompnan pisa tambe a presenta despues y slangnan mas grandi y pisa a worde manda te laman pa asina chupa awa pa combati e candela cu cada minuut tabata birando mas grandi.

Hoogwerker na parti patras di e edificio, a cuminsa basha awa riba e edificio na halto. Pero locual tabata kimando dificilmente bombero por a logra domina, corda paga na e momentonan ey.

E candela a sigui su rumbo destructivo y a devora tur locual e por a topa na caminda.

Por a scucha articulonnan ta rementa for di otro y vlamnan tabata produci aire cayente.

Mirando cu e comandante en-carga a haye den un skina basta cayente y e no tabata mira un solucion rapido, ademá pa evita mas edificio di pega na candela, a determina pa haci un peticion na Valero pa bin duna un man.

Di la Cabana tambe e cuerpo voluntario a presenta, mescos cu hopi ex bombero cu a bin duna un man voluntariamente, mientras cu Cruz Corra tambe tabata presente cu su miembronan y equiponan pa asisti.

Helicopter di polis tambe a lanta vuelo pa asina vigila e situacion for di laira pa pasa informacion pa polis y bomberonan di e situacion cu nan ta mira.

Polis tambe tabata tin nan mannan yen pa tene publico na un distancia.

Careteranan y crusadanan a worde sera pa evita automobilistanan di yega cerca y di

paraliza trafico den centro di Playa..

Weitnauer den caya principal tabata worde menaza tambe pa e candela cu tabata creciendo.

Biento tabata hunga un rol tambe durante di e incendio. For di esnan den helicopter tambe a worde reporta riba e posibilidad cu e dak di Aruba Bank por pega na candela.

Pero bomberonan a cuminsa muha tanto Aruba Bank como Weitnauer pa tene e edificionan y daknan muha.

Tambe for di tera a notifica e piloto pa no bula mucho abao pa evita su propeller dilanta e candela mas.

Varios unidad di ambulance tambe tabata den cercania pa drenta den accion mes ora pa transporta posibel victimanan pa hospital.

Te asina leu cu por a nota, ta dos miembro di bombero a sinti curpa malo, y a haya asistencia na e lugar mes. Pero e total di miembronan di bomber cu finalmente (te na momento di ciere di e edicion aki) cu a bay hospital pa tratamiento tabata seis y dos di nan tabata hospital aindi pa 11.30 or anochi.

Prome cu nos sera nos edicion por menciona cu e daño ta den miyones di florin.

Pa 12 or ayera anochi, ainda tabata combati e candela cu na e momentonan tabata grandemente bao di control caba..